



©HANS STRICKER

## Dunnas prudentas elegian prudent

DA SILVIA HOFMANN AUF DER MAUER

■ **En la vita d'ina dunna datti ina u duas chaschuns per far l'elecziun decisiva. Ina decisiun ch'avra u serra la porta. Tut tenor. Jau manegel l'elecziun dal partenari da vita.** Questa elecziun sto esser prudenta. Ch'i dettia in di uffants u betg, ch'ins veglia far carriera u betg: Las dunnas duain ponderar bain, cun tgi ch'i sa lian. Sentiments ord il venter u intuiziun pon esser cusigliaders adequats. I dat vairamain dunnas che fan bunas experientschas uschia. Main adattà è l'esser inamurà. Quel perturbescha memia zunt l'egliada clera. Perquai ch'ils agens giavischs domineschan la realitad. Dunnas prudentas giuditgeschan il me-glier praticamain. Co cumporta il partenari futur l'autonomia e l'indipendenza feminina? Con buns è el da contractar? Vesa el sasez plitost sco forza auxiliara en il tegnairchasa u sco cunresponsabel? Ha el

ina atgna vita sociala activa? Las respostas sin quellas dumondas èn impurtantas per la convivenza tranter partenaris. La repartiziun tradiziunala da las rollas era circa questa: L'um porta a chasa la paja e la dunna s'occupa dal rest sco tegnairchasa, uffants e vita sociala. Oz portan omadus ina paja a chasa, repartan il rest gulivamain tranter els e s'occupan communablamain da quel – quai dovra dun da contractar. Questa varianta è garant e schanza che dunna ed um pon plitost s'engaschar voluntari, per exempel en la politica. Jau sun persuasa ch'i dess bler dapli dunnas en la politica (u sin posts da cader en l'economia) sche daplis pèrs vivessan sco partenaris e concedissan in a l'auter dapli autonomia ed independenza. Las dunnas pon eleger. E dunnas prudentas elegian prudent.

**L'autura è deputada en il cussegl grond e viva a Cuira.**